



**Puo ea Mohlomphehi Tona-Kholo,
Dr. Moeketsi Majoro (M.P).
Ketelong ea Morero oa Phepo e ntle ea Masea,
Motseng oa ‘Mate, Leribe.**

Ka Labone la 8 ‘Mesa, 2021

Motlotlehi Letsie III

Mookameli oa Ntlo ea Mahosana

Motsamaisi oa lipuisano ka lekhohleng la Sechaba

Moahloli e moholo

Motlatsi oa Tonakholo

Mookameli oa lekhotla la Maipiletso

Matona a khabane

Baahloli ba Lekhotla le Phahameng

Litho tsa Matlo a mabeli a Paramente

Mokhethoa Oa Pela Tšoeu

Morena oa Sehloho oa Leribe

Litho tsa makhotla a puso ea libaka

Mongoli e moholo oa Mmuso

Bangoli ba baholo ba makala a ‘Muso ba teng koano

‘Musi oa Setereke sa Leribe

Bo Mme le bo Ntate le lona bana

Kea le lumelisa Linare tse Tala Tsa `Mamosa le Molapo le Sechaba sohle sa Basotho.

Ke etetse 'Mate mona hoseng hoa kajeno hobane ke boleletsoe hore ha seoa sa Covid-19 se qala hoba teng koano Lesotho, `me se baka tlokotsi ea tlala, lona le le batsoetse ba 'Mate, e ne e le khale le qalile ho itlhalisetsa lijo, le bile le li pheha ka nepo molemong oa ho fepa masea le malapa a lona.

Ka hona, ke fumane ho le bohlokoa hore ke le thoholetse ke le shebile mahlong etsoe Mosotho o re taba li mahlong; hobane le mohlala oa kamoo Basotho ba atlehileng ho fenya likoluo tse ngata-ngata tseo ba phetseng kahará tsona mengoaheng e fetileng.

Ke bontše hore tsena tsohle le atlehile ho li fihlela ele phethahatso ea mosebetsi oa letsatsi le letsatsi oa Ofisi ea Khokahanyo ea Lijo le Phepo, FNCO, oa ho hokahanya makala le mafapha a fapakaneng a 'Muso, bafani le mekhatlo ntlafatsong ea tlhahiso ea lijo le phepo e nepahetseng.

Sechaba Sa Heso,

Ngoahola ka Pulungoana re ne re le seterekeng sa Quthing moo re neng re thakhola letšolo la toantšo ea tlala ka tlhahiso ea lijo e le karolo ea ho loantša seoa sa Covid-19. 'Nete ke hore re ne re tseba hore Lesotho joaloka linaha tse ling tsa lefatše le tjametsoe ke khatello ea tlala le phepo e fosahetseng tse bakoang ke tlhahiso e fokolang ea lijo empa seoa sa Covid-19 se ile sa re bontša hore bothata bona bo batla re potlakele ntlafatso ea tlhahiso ea lijo kaharà naha.

Ke ka hona ha Covid-19 e patela, re ileng ka kena ka matla mererong le mesebetsing eohle e khothaletsang tlhahiso ea meroho e fapakaneng majareteng, lijo-thollo masimong le liphoofolo ka mefuta eohle ea tsona.

Ke lakatsa hore sechaba sohle sa Basotho se ithute ka lona sechaba sa 'Mate, Morena oa lona le boetapele bohle ba sebaka sena hore ruri pheko ea mathata oohle a rona e matsohong a rona.

Ke boetse keⁱ leboha sehlopha sena sa Setereke sa Leribe sa Phepo tlasá khokahanyo ea Ofisi ea Lijo le Phepo ka mosebetsi ona o motle. Ke bohlanka bo hloahloa ba lona

bo entseng hore ebe 'Mate ke mohlala o motle ho batsoetsoe le sechaba sohle sa Basotho ka ho itlhahisetsa lijo le ho li ja ka nepo.

Kea leboha bahlanka ba heso. Le lona joaloka batsoetse ba 'Mate, le mohlala oa bosebeletsi bo botle ba sechaba sa Basotho.

Ke qetella ka ho leboha mofani ea atlehisitseng morero ona e leng World Vision- Lesotho, eo e saleng e le mofani ea matla ntlafatsong ea bophelo ba sechaba sena sa Basotho. Ha bafani ba thusa mererong ea mofuta ona, kaofela re lemoha le ho ananela bohlokoa ba ho sebetsa ka kopanelo re utloisisa hore morero o ntlafatsa Mosotho ka tšehetso ea lichelete kapa botsebi ba mofani.

Khotso! Pula! Nala!